

處

實

堂

集

處寧堂續集卷之三

丙丁稿

長洲張鳳翼伯起撰

賦

兔賦

星散玉衡孕成口吐赤目若然雄毫欲翦奚宜之施胡蹄
之遇憫周道而登詩遊梁園而入賦避田株而罔觸騁中
山之捷步無假乎王符之三窟胡畏乎韓盧之一顧寄廣
寒之清影托毛穎於竹素入管城而雲霞俱飛封即墨而
帶礪同固

五言古

自壽效陶體

年齒日以增筋力日以減忽焉甲子周因生歲華感生平
愛泉石無意榮軒冕矧復當晚暮轉於世情淺承顏壽慈
母壺尊力能勉二男三猶子諄諄勸爲善課書在明理豈
必盡通顯延年雖可慕勝天吾豈敢湯云百歲期但令兩
眉展

王太史遺二葛賦謝

客從洛陽來遺我二端絺裁爲三新衫頗與當暑宜豈惟
惠野人燕以及二兒冰紈不足珍空穀亦奚爲清風兩腋
生稱茲白接離秋來敢棄捐散篋襲藏之時序自變易歲

寒還獨特

題仙桃白鹿圖壽蔣叅岳

朱明開壽域紫氣凝吳淞上有千歲實下有二茅龍杖履
寄東山聲華高岱宗雖開蔣詔逕已卜丁固松朝歌麟趾
章且也靈秀鍾熙朝崇世官次第期登庸

挽馮憲使化之呈汝金

歲寒戒北征歸期訂春陽西問胡爲來使人摧肝腸橫金
豈不榮客死良足傷咫尺違天顏迢遙返故鄉嗟予愴笛
聲念爾悲琴亡不知忘憂草何以樹北堂

七言古

東家課兒行

東家老翁課兒書一日數行求有餘歆之西鄰讀書子紆
金拖紫乘高車爲文期合主司意豈必經綸真濟世主司
去取執主之湯自勞勞爲兒計

題百子圖

前榮長宜男後庭生益母大兒孔文舉小兒楊德祖森森
竇桂何可擬垂垂海榴不足數房櫛瑞靄兆熊羆百子聯
翩多白眉輕煙暖護藍田玉微雨膏滋玄澗芝繞膝持觴
競稱壽汾陽時復一頷之

去婦行

君恩不薄妾命薄姻緣自好終成惡君擁邯鄲上妾牀妾
從厮養改新粧從今若夢當時好醒來難向今人道

題范蠡載西施圖

少小村中學浣紗大夫謀國妾離家落花飛絮同飄泊敢
向君王興怨嗟入吳一笑傾人國報讐雪耻伊誰力國亡
家破妾從誰誰復論功及介推大夫合載西施去豈是巫
臣私夏姬只今帶礪誰能久五湖煙水皆吾有扁舟不早
泛鴟夷鳥喙君王烹走狗

讀史

馬牛變幻風塵裏唾手金刀亦撚指一家物還與一家處

士應先竟齊史風景不殊人事異王儉成灰褚淵死試問
三蕭迭廢興何如二何呼不起

爲唐叙州題其贈君澗松齋圖

泰岱長松封大夫千秋挺秀靈氣扶翠微朦朧白雲香綵
筆刃出巢雲圖圖中點染巢雲者澗邊結屋長松下楚楚
湯言非棟梁森森直堪施大厦嗟哉匠石老未逢考槃歌
罷憐孤松興公老去和嶠死丁固還應十八公蕭齋舊是
棲賢地松門此日埋徐穉百年閱世非小草一子出山仍
遠志霜皮澗底龍鱗全霧鬣齋前麈尾傳堯本無心餌松
實莫道僱佗非是仙後凋已見凌冰雪雨露新恩下巖穴

爲君載賦角弓詩封植孫枝獻丹闕

郭程諭望雲遙祝爲姜伯龍賦

林宗文孫弁八閩武夷發秀超人倫蘇湖教授應爲貧登
堂含顰別慈親慈親白髮年耆耄遠道何堪涉江浙一車
回首親舍雲寒邈自擁程門雪令妻克順日承歡懷親猶
擬祈解官未許埋輪廣文席方期推轂惠文冠青衿多是
君桃李兢說先生孝能子臨風遙稱百歲觴不須王母三
青使重陽令節秋氣舒繞砌萸金襲錦裾計日新恩下丹
闕絲綸盈軸是天書

海陵榮壽歌祝顧太夫人

海陵壽域開華堂笙簧迭奏綺席張寶婺流輝燭牛斗瓊
花作壽飛羽觴慈顏以和冬日藹宛見靈萱樹堂背詎云
難老八千秋還見忘憂三百歲函關紫氣從西來兢進瑤
池王母杯桂子天邊棟隆吉孫枝膝下凌雲才洊至封章
錫天寵絲綸映戶恩光重霞裾明珮恍上仙雙成豈必專
推董聲華誰得比中丞臺端獨坐由延登方當鎖鑰鎮遼
冀未得扶輿從廣陵側席由來重邊守中丞壽邊古稀有
功成飲至賜大酺壽母應叨 帝壺酒

陳翁獻壽歌

維揚多士何翩翩元龍孫子尤稱賢蚤歲蛟龍生筆底士

林執苑誰爭先鄉書刻薦掄魁始當代鉅公喜桃李飛鳴
共擬擢天門許身計日紆青紫柰言李廣獨數竒禮闈報
罷無人知臺高燕雲九重遠淚盡荆山雙髻絲一旦遭逢
新雨露臺郎即拜非遲暮通籍何須桓典名閒居仍讀安
仁賦中壽欣看八十強謝庭玉樹俱琳瑯燕之嘉賓滿四
座次第同稱百歲觴須知人生貴適意山青沙白惟吾志
君不見白首公卿候早朝貂裘不暖霜風高

龔氏伉儷端陽獻壽歌

古昔稱齊眉豈必眉壽齊君家齊眉亦齊壽高堂賢夫偕
令妻聞說少年遊辟雍聲華六館咸推龔有明蘭芳持夙

誠一官小試歸扶風宦遊江右寄遐覽匡廬入望輕軒冕
鹿門深處共煙月桃源雲中養雞犬有時倚杖立柴門呼
客同領北海尊無論門前五楊柳但矜膝下多兒孫年登
期願益強健豈若廉頗惟善飯延年應有續命絲請君持
向明廷獻

五言律

郊外探春

徑轉蒼筠合溪迴碧澗臨風煙開歲賞泉石故年心寺許
携尊入花宜引客尋詠歸非寡和林際有鳴禽

經徐園有感

勝地接城闈名園占早春疊山微有壑鑿沼暗通津竹樹
蒼苔古亭臺畫棟新不知百年後傳舍屬何人

櫻桃

花事先群芳盈盈似海棠半開疑左袒一樹覆東墻實結
呈檀口盤餐和蔗漿如逢叔孫氏還可備春嘗

送杜上林子庸入京

戀闕志須酬乘春帝里遊微官資薄祿大隱亦清流賦
就相如渴詩繩杜甫愁憐才屬樞要明月正宜投

送趙金部汝文還朝

趙壁應無價何論十五城承親斯用譽筮仕即蜚聲足國

文錡入當關紫氣迎早年叨驥附此日惜鴻征

月夜彭美徵叩扉而去追之莫及悵然有作

高燭不須秉夜遊誰爲催竹聲風送至花影月移來可惜
唯春色難忘是酒杯相過誤題字獨立更徘徊

題周文學公謹閱山樓

修曲儼垂虹軒窓挹桂藜三冬期足用一簣奏全功賦與
登樓異山疑招隱同須知鵬路近計日快搏風

戲荅薛秋官士立

鍾情唯我輩微尚喜君同一自雲泥隔都成牛馬風緘書
愁轉劇顧曲夢應通何處遙相望春明杯酒中

贈別黃憲子

秣林誰第一 江夏自無雙
未見衙官列 先令旗鼓降
玄談霏玉屑 淹坐剪銀缸
別後知相憶 松風入夜窓

端陽獨坐

委逕絕巖塵 端陽物色新
樂闌生半夏 花砌點長春
兢渡卑吳俗 歌騷憶楚臣
綵絲何用繫 續命在怡神

湯作

秋色石梁東 偏宜半畝宮
功名青史外 身世白雲中
吳市藏梅福 臯橋隱伯通
須知千載後 猶可紹遺風

紀夢

落魄一儒生常矜武備并臨風貪擊劍結客喜談兵失路
空懷刺無媒湯請纓壯心惟夢在策馬出長城

聞文基聖解組喜而有作

秋色動鄉心辭榮解上林車懸陸賈劍囊有二疏金不負
青山諾何妨白髮侵故人儲醴酒賞菊佇同斟

仲氏遊白下附寄荅吳幼安

少別十年餘相憐兩鬢疎知君鮮推轂類我謝公車短燭
開緘後長干落木初片雲將鴈去愁絕數行書

孟冬望月

露淨月偏白清光遙逼人雲霄懸照乘河漢渡冰輪漏斷

歌仍續寒催酒更巡明朝晴未卜勝賞莫辭頻

羊郎席上別王生

衰柳不堪折臨岐愁送君津亭一尊盡江浦片帆分行色
青萍劍流風白練裙登樓應有賦何以慰離群

題俞氏蕙圃社

蕙宇愜承顏城隅一徑偏煙霞人外賞琴酒竹中賢結社
群藹著齊心禮白蓮三生何待問先已卜長年

雲履易僧鞋

北郭寒蹤見西來幻跡聞多君舒白足媿我步青雲踏雪
從伊便生花念彼分邇時憂失脚踏坐且離群

異星有光如新月感而作

顧影忽疑月舉頭知是星
光芒出西陸閃爍射中庭
隱見豈無故災祥既有形
吾將考靈憲駿烈媿遺經

臘月廿七日觀迎春是日濃陰欲雨

次第青陽逼細縕絲仗閒臘
隨殘歲盡春及故年回盤菜
千門酒江花幾樹梅東皇行
潤澤雨意獨相催

荅中貞王孫

尺素遠相將開緘感八行
十年叨世誼千里望天潢
嗣父成元凱承兄即季方
會須勤折節蚤聚及青陽

夢中紀遊

玄圃豈難通青蓮隔海逢雲霞開大地日月闕神宮滉漾
河山外逍遙島嶼中到來龐也吠猶似引天風

輓同年張伯可

薊門星散後回首十年餘鶴跨辜良約魚沉杳尺書乘槎
牛斗去落月屋梁虛亦欲越疆弔悲哉無素車

送俞士立擢僉閩憲

士立常刺福寧

閩海昔專城重看建節行春風新憲府冬日舊仁聲豈不
歌驪惜其如竹馬迎須知虛九列入且作名卿

客有嘲予貧者戲荅之

敝榻寄高眠閒心惟泊然飲泉能學蚓抱葉可同蟬不兢

囊金盡無營室磬懸莫言徒四壁猶有研爲田

兆通宅看牡丹紀興

淑氣遍郊原幽尋叩華門欣看洛陽種來發仲長園逸興
人歌雪餘歡客命尊湯言雲錦粲還有素心存

野步連日作

稚子笑相問追歡何太頻不禁花進酒其奈月留人爭席
盤桓地逃禪信宿身須知謫仙賦曾有惜餘春

送木榻入魯

予有一木榻蓄之數年矣客以文鏡易之入魯貧不能存忍而與焉作詩送之

木榻筠窓下依依已數秋捲簾明月共欹枕白雲求幸未
穿當膝猶堪易杖頭一朝向東魯還好下南州

容以推轂見訝戲荅之

擊壤作堯民蹉跎不計春審時應攬轡顧我已埋輪豈有
煙霞癖元非軒冕身亦知捧檄喜其柰重違親

擬古閨情

睡鴨冷殘灰年華鏡裏催路長音信短人去夢魂來蝶粉
消輕絮鶯黃送落梅春潮自往返不復帶春回

石禪庵

人境亦開林疑山鑿石深香臺森法界水月印禪心演教
花成雨觀空粟是金遙聞巖酒禁未可赴招尋

與韓黃二子小酌

不貳韓康價無雙江夏名共耽人外賞那有世間情掃徑
花齊放開尊酒自傾往來都任意豈復尚逢迎

胥江閒泛

散髮濯滄浪悠然野興長片雲歸震澤踈雨過橫塘鼓枻
汀蘆暗沿流水荇香輕鷗忽飛去機事未渾忘

吳黃門以還妾種德連舉三子

惜樹方完璧徵闈即弄璋一支綿世澤三秀毓靈光問姓
無煩卜克閭已發祥須知啟麟趾次第列鵷行

賦得太虛室

物外掩精廬澄懷返太初天花空是相野馬氣爲車上客

談烏有詞人賦子虛不妨生白處四壁似相如

客過小酌愁米價

季主正垂簾留賓味不蕪尊閒桑落酒盤出水精監泉石
元充腹煙霞足養蔗雖無五斗米未必餓陶潛

中秋深酌

月至中秋望人期百歲看嘉賓同燕喜稚子解承歡素影
分河漢清輝散廣寒湍殘餘興在且放酒腸寬

送彰德張郡理應 詔入京

征馬薊門行驪歌動洛城 帝心勤舜選除目冠張衡殘
雪搖飛旆清流試濯纓須知雙闕下應有鳳皇鳴

送鄧長洲應召入京

江館促王程東風挂席輕
琴清聲上逮花發縣空明
坐惜雙鳧往行看一鳳鳴
九重方側席知不憚宵征

贈孫國醫士宣

思邈貽謀遠聞孫衍澤
長竒功標種杏秘術擬傳桑
春滿籠中物機圓用後方
須知吳市隱不獨有韓康

五言排律

蔣子徵文子悱二大夫
暨虞部姪携尊小園感昔

曩昔困風塵公車客路貧
十年三川足千里一羈人
回首遊踪倦忘形樂事新
文章慚大塊煙景借陽春
酒遣簪綰

盍歌憐魚鳥親狂來呼秉燭歸騎促朱輪

哭方伯八閩林師

師嘗守蘇終以戊辰年

千里尺書傳開緘一泫然神馳閩嶠外淚盡峴山前御李
聲均借思何望獨偏那知生死別復驗已辰年霜色彫棠
樹寒流咽逝川吳民歌舊德原氏起新阡才失平蠻檄旌
分秉鉞煙素車慚絮酒華表弔啼鵲戚戚應誰慰猶欣有
象賢

壽宋秋官孝甫

華屋列芳筵霞觴栢酒傳嘉平開令月葱蒨鬱寒煙却憶
登龍日遙憐躍馬年常編慚後乘剡薦羨先鞭白玉應歸

楚黃金如築燕一行推作吏千里試旬宣政績饒三善仁
聲邁五賢泮宮新夏雨井養冽寒泉強幹除稂莠慈和藹
白蓮戴星惟爾似推轂竟誰先再命移潯郡雙旌下岷川
去思輿論協遺愛口碑沿舊望匡廬峙新猷瀑布懸築隄
棠蔭合拯溺禹功全盜弭萑蒲聚屯清虞芮田風霜挺松
栢雨露薄鷹鷂明試民繩理褒封誥綽聯留都承舜選簡
命下堯天官在爽鳩列人稱宿鳳遷平反三尺法大隱二
京篇司馬元非病楊雄慕守玄封章千里牘歸思五湖船
南極方中候東山物外緣仁人應有後事業已無前澗底
玄芝秀林中竇桂妍花遶繩景賦門下奏譚絃名字題屏

上勳勞在日邊 熙朝崇舊德未許學遊仙

壽蔣少叅子徵

三徑舊風煙吳淞逸興偏松筠深魯塢日月近堯天輿論
推公輔家聲振象賢黃金橫作帶白玉種成田百歲期過
半千秋業已全泥塗慚曳尾雲路羨先鞭李杜名何敢雷
陳誼益堅素心如一日青髯感流年筆研追同席尊壘廁
四筵東山雙屐勝南極一星聯永日歡文酒薰風鼓舜絃
夔龍方接武未許老林泉

六言律

夢月夜邀留李太史本寧陸貢士重周飲雪釀二君

不相識面各天一方同入予夢覺來不覺失笑紀
以六言一律

陸機入洛奏賦李白乘舟欲仙千里雲山遙隔一壺雪釀
相牽豈是萍逢識面無端蔬酌流連會向廬山蓮社同證
石上前緣

早春陰雨作

已過年華荏苒將來春信浮沉壯心唯有夢在衰髮不爲
愁侵信宿梅邊寒雨蹉跎柳外鳴禽只合黃庭一卷焚香
跌坐長林

丁亥大水

胡然浹旬霖雨莫涸田野荒蕪豈欲民其魚矣顧使吳其
沼乎歛足六街三市舉目三江五湖祈晴則猶可及敢告
郡邑大夫

七言律

丙戌元旦

蹉跎歲序忽驚神在苒年華曳尾身天上風雲千里隔人
間甲子一回新登堂拜母斑衣子在野朝元白屋臣繞膝
自憐雙玉樹頻傾椒栢祝長春

新正二日大雪時立春已踰旬矣

朝來栢酒醉傳杯子夜空窓曙色開壓倒數竿籬畔竹粧

成千樹嶺頭梅惹燈花落寒威逼紙帳光搖短夢催却喜
袞安僵卧處春風先暖不然灰

郊西大梅樹

丰茸一樹占年芳偃蹇西郊百尺強蒼蘚爲君添歲月青
春憐汝歷冰霜遙林雪霽窺三白極浦風生度七香結子
莫教容易摘和羹猶可薦明王

散步北城王潘二君携酒大弘寺深酌

城隅新霽法堂開仙侶携尊選勝回老去湯誇雙足健春
來其奈百花催鉢池成路蛙仍禁淨海栽桑劫已灰淹坐
不愁昏黑散長明猶可借蓮臺

感興二首

畫梁巢燕苦經營高樹還遷出谷鶯萬事總輸頭着枕一
春又見絮爲萍漢陰抱甕機應息蓋次狂言坐莫驚大慶
不知君覺未達觀聊復寄浮生

經旬風雨送殘春綠滿喬林物色新簷燕知誰堪作主海
鷗於我自相親閒雲常護疑香寢缺月猶窺罷釣綸壽母
已辭薇仲子湯將伐國問仁人

江夏黃憲子錢唐童申甫二明經同過園居小酌湯
賦因呈沈郡公

黃童雙駕訪紅園掃徑呼兒倒綠尊老我已知殊出處對

君亦自覺飛翻輕帆將夢迷雲樹歸路乘潮帶雨痕獻賦
不須嗟雙屈卽今聲價重龍門

久雨病瘍湯作

積雨藜林鷄息宜坐移長日不須棋過墻蝴蝶能通夢
淚庭花如感時消渴媿非題柱客病瘍應作折肱鑿科頭
箕踞本吾事咄咄書空君莫疑

贈陸學憲羽行

早持文賦獻臨軒十載題屏斗望尊劍佩芙蓉趨鳳沼花
蕃桃李作龍門白雲暫借東山屐紫氣常延北闕恩計日
起家應九列鼎來綸綍正春溫

客有言中貴欲枉顧賦此辭謝

蒸藜炊黍足閒身
白月清池互主賓
誰謂相如擅詞賦
敢祈得意薦鄉人
科頭任我成迂癖
閉戶由他生網塵
十載直躬艱磬折
莫教苔徑點朱輪

遙贈彭諸顧三進士三君初未相識讀其疏感其節烈故遙贈之

依然衣褐出長安
射策何如抗疏難
功在進賢冠可挂
名高斬馬劍應彈
孤臣淚盡肝腸雪
姦宄辭窮心膽寒
聖意賜環惟薄責
直聲先已播朝端

清卿許公仲貽年踰八十矣念予懸弧之辰遠惠書

賦感而有作

帝城江上隔蓬蒿
世外仙鄉斗望高
迢遞關河馳鳥使
殷勤書札贈綈袍
五千別自成玄草
八寸猶能賦綵毫
聞說謝庭森玉樹
形墀行見鳳皇毛

許職方應祥撰文爲老母壽賦謝

仙郎飛藻自球琳
壽母何須仲子金
萊綵十年諳衣褐
牙絃一鼓媿知音
清時喜見馴龍性
濁酒渾消老驥心
悵憶西曹應不遠
縉雲常在鳳城陰

懷王司寇時次公清卿將赴任留都

清朝羅網出珊瑚
滄海猶遺明月珠
丹竈幾時成九轉
紙

毫還復賦三都城隅餞別分鴻影庭下傳經引鳳雛豈爲
故人譏布被年來一水尺書無

王節

婦節婦爲文學憲明配侍御張公伯大女也少

江不得其尸至丙戌五月五日湧出江上去沉之

日八月矣而肌髮若生鄉人驚歎擬爲立祠是作

鯨波自覆栢舟身鮫室何容螻蟻親掃墓未歸成死魄入
江不化作完人仙槎破浪衝牛斗玉壘沉雲泣鬼神應向
重泉憶慈父特將疏草質靈均

賦得一詩寄荅清卿許公仲貽邴以公仙去竟不爲
達而返再成一律爲挽并致感云

一紙空回是陸沉交情誰達死生心五千甫畢猶龍事信

宿翻成弔鶴音路入蓬山新紫氣神歸嵩嶽舊華簪高門
自有貽謀在已見孫枝鬱竇林

丙戌除夕志感

鏡裏流年物外遊湏知白屋是丹丘煙霞漸覺雲霄遠歲
月俄驚甲子周自信塞翁能體道誰言飛將不封侯閉門
莫笑甘離索本與時情風馬牛

丁亥元旦漫作

空園寂歷檢殘編湯憶京華躍馬年萬里澄清虛攬轡中
原事業愧先鞭窓梅送臘篝燈坐池柳催春聽雨眠老母
壽康兒長大椒花入酒共陶然

丁亥上元立春二十餘日矣木冰如雪作

陽氣方開物候先稜祥忽似永徽年木冰何係清朝貴樹
介寧當紫塞煙雲入封條寒影亂風搖雜佩夜聲傳杞人
經術知無補湯檢箕疇一惘然

爲馮文學題蒼鹿圖壽徐宮詹

然藜天祿舊垂紳啓沃明光一寶臣星傍紫垣龍袞近雲
深丹穴鳳雛新方升黻座延登日未老熙朝協贊身後進
馮商稱好事遙將蒼鹿報長春

春日過劉觀察子威堂中顧曲劉有作奉荅

追歡艤棹入高堂病後維摩轉放光問字不須人載酒徵

歌自有客登場重邀舊雨迴青眼一顧新聲繞畫梁誰謂
壺機能杜德還將藻賦發春陽

送客

憐君負笈問迷津應作東西南北人擊楫中流江上樹着
鞭長阪馬頭塵不知末路貂裘敝空羨清朝象簡新倘有
洛陽田數頃何如歸息倦遊身

荅王太史胤昌書問

尺書千里問滄洲極目停雲一倚樓選學敢云追述著作
書聊爾寄窮愁年華不記遼城鶴機事都忘海上鷗聞說
東山將起謝已知名字覆金甌

園葵

愛爾園葵十尺強不煩培植自成行
品題未必從巴蜀黃紫何須艷洛陽
溼室湯憂吾獨樂公儀應拔我無傷
由來衛足還稱智却勝嬌姿祇斷腸

荅同年吳幼安書問并致弄璋之祝

故人落魄嘆飛蓬往事空憐剡薦同
季重自宜淹鄴下幼安豈必在遼東
孤雲飄泊三山外雙鯉沉浮一水中
種玉只願方寸地問君何日夢熊能

贈趙媛兼呈周郭諸君

昭陽往事自紛紜合德今身合是君
豹霧書迷仍作雨鴛

及聖學新升卷之三
三
袞春暖復爲雲醪不厭高陽侶嬌唱時令子夜聞老我
獨耽蝴蝶夢竹林常負鳳皇群

爲李文學賦得讀書獨醒齋

端居物外類逃禪永日蕭齋手一編不用鋪糟成獨醒何
須濁酒可中賢朝臨白社籃輿駕夜燭青蒸木榻穿聞說
五車充鄴架惜陰知爾着先鞭

送王太史胤昌服闋還朝

報道王陽讀禮餘秋風戀闕更駟車東山自擅林泉勝北
極寧教講幄虛計日黃麻登紫閣暫時金馬佩銀魚洛中
雖較長安近不似皇都好寄書

姜伯龍以儀炬見寄走筆附謝

一水遙憐雙鯉魚，絨題不遣故人踈。
八行展對如顏面，滿紙殷勤問起居。
添我尊羹供母饒，燒君蠟燭課兒書。
懸知抱膝耽佳句，應有新詩能啓予。

哭莫廷韓

憶昨相憐蓋獨傾，鐵巖命酒一班荆。
黃金忽罄儒中俠，綵筆空餘海內名。
仕籍未能收國士，箱書何得付門生。
高堂耆壽孫謀在，應啓遺孤慰九京。

寄祝朱道光郡博於雲間

憶得髫年逐鳳群，二毛如我亦憐君。
須知紫閣應推轂，聊

復青氈寄廣文一水眼前三泖月諸生門下九峯雲懸弧
此日逢佳節會有新詩啓見聞

姚江二史大夫予舊雨也既成契濶問訊枉顧相仍
感而有作

尺素殷勤屬乃公高軒枉訊象賢同十年空抱千言牘一
字慚輸兩石弓厚祿故人成拙宦多情濁酒醉新豐逢迎
易作江干別惆悵神馳天際鴻

褚進士邀飲

名儒好事紹遐芬虛左叨迎意獨勤老去已無鴻鵠志與
來還逐鳳皇群杯傳桑落酣邀月出壓梨園度過雲信是

忘疲綠愛客勸酬不惜到宵分

送杳鳴重遊建寧兼問薛士立觀察

一葉衝寒千里行八閩風物在逢迎
湯言栢府新霜厲應有筠窻舊雨情
到日劇談鄉國事暇時同看海雲生
獨憐鷄息長林者悵望黃華作五城

雨花臺圖

鳳城南下雨花臺石磴盤旋勝覽開
江上煙波深島嶼雲中宮闕麗蓬萊
參差寶樹諸天合遠近帆檣落照催
二十年前舊遊處披圖彷彿首重回

李侍御枉書見存有感

早辭行役謝公車日夕園林御板輿作賦豈堪干得意薦
雄湯擬似相如神驚驄馬三青使淚盡雙魚尺素書泉石
已看成痼癖須知勲業落樵漁

張黃門服闋還朝過文起堂顧曲

驪歌差可拂梁塵顧曲寧辭別酒頻禮法既能寬叔夜霜
威應爲霽陽春三年縞素南陔子萬里風雲北闕臣到日
陳風還有疏爲言擊壤是堯民

戲贈陌上醉客

高陽徒侶竹林儔衫袖淋漓陌上遊無論功成酒泉郡已
堪官拜醉鄉侯提壺每入黃公市解佩嘗登太白樓萬事

破除知己盡首丘應不遠糟丘

宋明府枉過小酌口占奉贈

湯言驥尾附鄉書出處殊途音問疎
敝刺入門驚契濶微官得罪惜離居
身歸鳥道千山外淚盡牛衣九死餘
總是親朋已凋落一尊猶可對江漁

王穉玉僉憲惠顧失迂枉詩見投奉荅

省中才望屬仙郎客路緘詩寄八行
乍出瑣闥焚諫草新開憲府促行裝
淹留枉駕煙霞興拂拭題門翰墨香
敷歷定知當叱馭豈逢九折作王陽

小除夕王恒叔給諫枉駕失迂明日候之舟次率爾

贈別

父郎車轍破，莽苔臘盡城隅訪。戴回不及候門慚，地主湯
勞仙史下天台。期當白簡朝元近，除逼青陽歲序催。河畔
逢迎擬明發，題詩應寄渡江梅。

賦得瀛壺九轉丹爲郡大夫東嘉沈公壽

公庭雲淨訟方稀，葉縣泥香緩帶圍。白雪易成丹欲轉，紅
顏難老火將飛。西池雨露金人掌，北極綵綸織女機。計日
登瀛化雙鳥，蓬萊宮闕理朝衣。

賦得新甫栢爲郡大夫沈公壽

當筵三復闕宮詩，恍見崔嵬千尺姿。香葉拂烟經鳳宿，直

根得地許龍知文章已際風雲會雨露何嫌造化私材大
自應隆棟吉延登臺府及清時

寒食次韻答阮文學見懷

蕭蕭竹徑點蒼苔無待羊求忽自開古鼎近寒初禁火新
詩遙煖不然灰池塘春草酣魚鳥窻戶輕烟護草萊筆硯
久枯慚和雪巴渝一曲爲君裁

題顧學憲道行諧賞園

已知桃李在公門更喜歸來松菊存繡句遠尋康樂詠嘉
名重紀辟疆園臥遊別有煙霞興坐嘯元無車馬喧應是
貽謀計清白獨留雲月遲文孫

寓題蕭京兆寶綸樓

三輔旬宣試望之九重綸綍下彤墀樓迎燕賀新成日雲
擁鸞書錫命時祖武百年光令德君恩千載際昌期須知
異夢徵神授不待甘泉五色芝

七言排律

壽韓少宗伯

期屆生申綺席開五雲先麗鳳皇臺壽添一甲成新賞潮
湧三山入酒杯南極壽星聯北斗西來紫氣傍中台凌霄
玉樹森成桂計日金甌待作梅信是秩宗明禮樂不須仙
吹下蓬萊野人欲劾岡陵祝握管臨風媿乏才

壽湯秋官

極目三山紫氣高，雲司春酒醉仙桃。
都門吏隱疑龍臥，膝下稱觴總鳳毛。
潘岳一官非宦拙，望之三輔自賢勞。
疏存舊望懸青瑣，興寄新詩賦綠毫。
南極輝光聯北斗，東吳聲價重西曹。
早年驥尾慚虛附，奕葉絲蘿媿謾叨。
此日泥塗攀戀切，祇應丹闕夢雲璈。

五言絕

詠紵

文綺千金值，言從孟母機。
剪裁堪補袞，今作老萊衣。

瀟湘八景

紅日落虞淵丹山凝紫煙家家收網苦戶戶泊漁船

右漁村夕照

遠浦渡歸僧空山紫翠平林深不知寺惟聽暮鐘鳴

右煙寺晚鐘

十二晚峯青秋雲起洞庭遙空排鴈字次第落沙汀

右平沙落鴈

密雪深暝色彤雲布天際寄言獨釣人江寒魚不餌

右江天暮雪

天空月在水水明照見天飛帆貪夜涉來往若犀然

右洞庭秋月

一片蒼梧雲因風臨極浦欲洗竹上斑來作巫山雨

右瀟湘夜雨

天際片帆孤乘風忽有無飛鳥能送客隨過洞庭湖

右遠浦歸帆

茆店競朝春門開十二峯江頭新雨霽無復白雲封

右山市晴嵐

剪春羅

銀剪飛輕燕丹英綴薄羅不堪裁短袂只合映羞蛾

水仙梅

翠帶飄香魄虬枝綴玉痕相看歲寒侶何必是同根

滹丹

湯憶美人顏
庭花燦滹丹
似扶殘醉別
脉脉倚闌干

水仙

金鈿點玉容
翠帶羞眉嫵
月明忽不見
幽香生極浦

題梅花山茶小鳥

瑤林兄與弟
兩兩結幽期
俱有歲寒意
山禽知不知

六言絕

題巢田園

休論洗耳誰
氏莫問棄瓢
何年巢許自
甘遯世唐虞
豈可

遺賢

題松

風傳山中宰相名
厠林間大夫但可科
頭箕踞毋論歲暮
榮枯

七言絕

池上

杏花開後是荆花
池上風微線柳斜
澗說曲江春十里
野人別自有韶華

秋江待渡

楓林秋入白雲寒
荷擔歸來欲渡難
總是風波行不得
豈無舟楫在江干

寄遠

當日班荆語漸微
陰符可解白登圍
如今臥却床頭劍
皓首江南一布衣

閨怨

六街羅綺闌芬芳
寂莫深閨老孟光
自喜荆釵宜綠鬢
不須高髻學宮粧

竹枝詞

白雲深處足徜徉
那得溫柔別有鄉
不奈梅英經再吐
輸他鐵石廣平腸

纖手推簾引郎入
依舊推簾送郎出
郎去郎來妾自知
幽

期那許傍人識

城南仙人塘

花滿城南酒滿壚
方平何處會麻姑
憑君試看蔡經宅
可有丹砂布地無

客自大梁來持文君聽琴圖乞題爲賦

年少文君新寡居
聽琴應慕馬相如
臨邛自有棲鸞樹
豈必梁園好曳裾

花事

樹頭纔見逐春開
又是殘英點綠苔
閒向東風自開落
徑花原不怨無媒

題朝鮮貢馬圖

鯨波風急片帆孤，萬里朝鮮東入吳。
天廡只今充八駿，漫勞航海貢龍駒。

題觀泉小景

絕壁飛泉百道流，扶卬寓目立高丘。
無人相賞松石意，與爾共爲山澤遊。

題燕賀人得子

華堂春色擅江南，綺席笙簧鼓十三。
門外烏衣邀賀客，聲只是說宜男。

謝人惠帚

十年却掃閉空村枉駕何時擁華門
傲日千金唯自享敢言清世有陳蕃

池上口號答文上林基聖

靈禽就掌李供奉書罷籠鷺王右軍
千載風流差可擬鴛鴦池上自爲群

宮詞

關雎一曲月黃昏金屋瑤塔多蘚痕
聖主方譚上林事詞臣空自賦長門

煙月朦朧照綺疏貂衾不暖象牀虛
夢回爲聽朝鐘起却是西宮夜飲初

望叔貽墓

一杯黃土湮紅淚千古青山瘞白眉
臺榭荒蕪聲伎散獨傳俠烈使人悲

解朝二首

神交宋玉巫山曲心許陳王洛水濱
千古風流元是幻人間雲雨不須真

洛浦佳人空寄恨高堂神女湯憐才
花前暢飲燈前別猶勝當時夢裏來

題仇實甫關山積雪

斷嶺寒開高插天流澌帶雪玉泚泚
莫憊僵卧窮閭巷薄

暮羈人還着鞭

池上小酌戲作

趁風柳絮花如雪，隔水梨雲雪作花。只恐潘郎頭亦白，且留青鬢醉韶華。

宿壽山庵

顧曲高堂酒未酣，夜深托宿壽山庵。湯言象外三乘妙，暫謝人間七不堪。

與二兒對月

素魄當庭夜色開，一尊呼取二兒來。不須顧影與邀月，先有三人同舉杯。

對月有感戲作

客醉朱門未偃回清輝猶俟管絃催空堂豈是豪華地
夜不期還自來

館娃宮

蛾眉忽散綺羅叢幽徑花深歌舞空惟有年年吳地月
往來還照館娃宮

貞孃墓

山中別有少年場急管嬌歌月一方試問載來紅粉妓幾
人舉酒酌貞娘

送客

一尊蕭館問行藏
風雨空林別思長
此去逢人應說劍
莫言吳市有干將

鴛鴦忽飛去四首

鴛鴦消息竟沉浮
不得相從沼上游
夾岸芙蓉自岑寂
稻梁多處任淹留

池邊一別竟忘歸
頭白蘆花冷釣磯
羽翼已成知不顧
煙波隨處任高飛

昔年馴狎綠鴛鴦
戲水凌波五色光
滂詫嗶嗶七十二
爭教顧影不成行

逐霧衝煙路欲迷
誰家池館恣翻飛
倦遊倘憶忘機侶
早

晚還來整羽衣

鴛鴦復歸四首

鴛鴦飛去復飛來
飲啄還從水上臺
老我機心渾忘却
任伊來去莫相猜

排荷拂荇足藏身
何必翱翔逐要津
莫道網羅容易脫
是非多處有虞人

去時已作楚人弓
來日如歸塞上翁
應恐人耽好顏色
羈留不得出雕籠

臨涯感水柰君何
應向韓憑墓上過
莫厭小池惟一畝
曲闌干外少風波

漁家謠四首

只見江湖不見田
稅田不若稅漁船
六街縱有魚蝦市
安得饑民但食鮮

尋常換酒只須魚
此日提壺何處沽
破屋毀垣餘斷岸
當時酒肆一家無

水深隨地好垂綸
只道魚多可濟貧
其奈家家愁米貴
滿城不見買魚人

飄風驟雨泣漁翁
不晚停舟紅蓼中
眼見桑田變成海
千村杆軸萬家空

金陵妓四首

時太宗伯有平康之禁

秦淮春去冷蘼蕪處處殘粧泣向隅豈是平康人盡老到
門車馬一時無

客散紅樓疊綺衾一時歌舞摠銷沉湏知靜對中秋月俱
有青天碧海心

被冷香消欲斷魂錯教芳草怨王孫萍逢易散風波起不
合當時何市門

當時爭下七香車此日空房淚似麻究竟還如蕩子婦潯
陽江上抱琵琶

題范蠡泛舟圖二首

報吳小試計然謀不覺功成已白頭只與西施同載去煙

波隨地着扁舟

非非岸柳雜汀花
煙水平湖處處家
豈獨謀臣能拂袖
美人亦自厭繁華

長門怨二首

長門只合有知音
賦就虛承取酒金
不欲上移金屋寵
何如還奏白頭吟

金屋花殘委綠苔
寵移新愛故情灰
君恩元似東流水
一去何曾肯復回

貧家女

碧玉香魂沉井底
綠珠冰骨墮樓前
貧家醜女村中老
白

首弄孫能永年

歎珠二首

名高照乘價千鈞十襲應憐掌上珍今日莫嫌人彈雀由
來按劍是無因

賈胡剖腹豈終裁求售還湏出夜光不道千金買魚目空
持明月獻君王

歎壁二首

湯言趙壁不留秦湏信連城未足珍趙國竟爲秦國有此
時完壁是何人

燕砮鄭璞遍人間灑淚何湏扣楚關不若卞和全兩足并

留璞玉在荆山

戲荅客問玄髮二首

早辭輦轂出風塵二十年來一釣綸
莫訝尚留青鬢在長林
元少白頭人

日高丈五夢猶長
贏得頭顱不盡蒼
假使隨班早朝去也
應染就鬢邊霜

感事

上方豈少斬馬劍
柱後寧無惠文冠
自是聖朝無闕政
不須彈壓在葦端